

tyrannen vor d' kindern

Noah.

Mose.

C. VI. VII.

III.



Als aber die Menschen begunden zu mehren auff Erden / vnd zeugeten inen Töchtere / Da sahen die Kinder Gottes nach den Töchtern der Menschen / wie sie schön waren / vnd namen zu Weibern / welche sie wolten. Da sprach der HERR / Die Menschen wollen sich^o meinen Geist nicht mehr straffen lassen / denn sie sind Fleisch / Ich wil inen noch frist geben hundert vnd zwenzig jar.

*(Kinder Gottes)
Das waren der heiligen Väter Ein der / die in Gottes furcht aufserzogen darnach erger denn die andern worden / vnter dem namen Gottes. Wie alle zeit der heiligen Nachkomen / die ergesten Tyrannen vnd verkerresten zu letzt worden sind.*

Es waren auch zu den zeiten Tyrannen auff Erden / Denn da die Kinder Gottes die Töchter der Menschen beschlieffen vnd inen Kinder zeugeten / wurden dar aus gewaltige in der Welt vnd behümbte Leute.

Da aber der HERR sahe / Das der Menschen bosheit gros war auff Erden / vnd alles tichten vnd trachten ires Herten nur böse war iner dar / Darum erwehet es in / das er die Menschen gemacht hatte auff Erden / vnd es bekümmert in in seinem Herten / vnd sprach / Ich wil die Menschen / die ich geschaffen habe vertilgen / von der Erden / von den Menschen an bis auff das Vieh / vnd bis auff das Gewürme / vnd bis auff die Vogel vnter dem Himmel / Denn es erwehet mich / das ich sie gemacht habe. Aber Noah fand Gnade fur dem HERRN.

Gen. 8.

Noah Sone.

Das ist das Geschlecht Noah. Noah war ein from Man vnd on wan / vnd füret ein göttlich Leben zu seinen zeiten. Vnd zeuget drey Sone / Sem / Ham / Japheth. Aber die Erde war verderbet fur Gottes augen / vnd vol freuels. Da sahe Gott auff Erden / vnd sihe / sie war verderbet / Denn alles Fleisch hatte seinen weg verderbet auff Erden. Da sprach Gott zu Noah / Alles Fleisches ende ist fur mich komet / Denn die Erde ist vol freuels von inen / Vnd sihe da / Ich wil sie verderben mit der Erden.

*(Meinen Geist)
Das ist / Es ist vmb sonst was ich durch meinen Geist / inen predigen / sagen / vnd straffen lasse. Sie sind zu gar fleischlich worden / verachten vnd lethern meines Geistes wort. Darumb sol er auff hören / vnd ich wil sie lassen faren / vnd nicht mehr mich mit inen sanken vnd straffen.*

Noah Kasten.

Mache dir einen Kasten von temmen Holz / vnd mache Kammern drinnen / vnd verpiche sie mit Bech inwendig vnd auswendig / Vnd mache in also. Drey hundert Ellen sey die lenge / funffzig ellen die weite / vnd dreissig ellen die höhe. Ein Fenster soltu dran machen oben an / einer ellen gros. Die Thür soltu mitten in seine seiten setzen. Vnd sol drey Boden haben / Einen vnten / den andern in der mitte / den dritten in der höhe. Denn sihe / Ich wil eine Sindflut mit wasser komet lassen auff Erden / zu verderben alles Fleisch / darin ein lebendiger Odem ist / vnter dem Himmel / Alles was auff Erden ist / sol vntergehen.

*Arca
1 lunge
2 weite
3 höhe*

Aber mit dir wil ich einen Bund auffrichten / Vnd du solt in den Kasten gehen / mit deinen Sönen / mit deinem Weibe / vnd mit deiner söne Weibern. Vnd du solt in den Kasten thun allerley Thier von allem Fleisch / ja ein par / Menlin vnd Frewlin / das sie lebendig bleiben bey dir. Von den Vogeln nach iher art / von dem Vieh nach seiner art / vnd von allerley Gewürm auff erden nach seiner art. Von den allen sol je ein Par zu dir hinem gehen / das sie leben bleiben. Vnd du solt allerley Speise zu dir nemen / die man isset / vnd solt sie bey dir samlen / das sie dir vnd inen zur Nahrung da seien. Vnd Noah thet alles was in Gott gebot.

*8 Manne
leben*

VII.



Da der HERR sprach zu Noah / Gehe in den Kasten / du vnd dein ganz Haus / Denn dich hab ich Gerecht ersehen fur mir zu dieser zeit. Aus allerley reinem Vieh nim zu dir / ja sieben vnd sieben / das Menlin vnd sein Frewlin. Von dem unreinen Vieh aber je ein Par / das Menlin vnd sein Frewlin. Des selben gleichen von den Vogeln vnter dem Himmel / ja sieben vnd sieben / das Menlin vnd sein Frewlin / Auff das same lebendig bleibe auff dem gantzen Erdboden. Denn noch vber sieben tage wil ich regen lassen auff Erden / vierzig tag vnd vierzig nacht /

A iii vnd ver